

# Judas lelpox carta Jesús pejuwajan naexasitiliajwa

---

## Judas lelpox carta Jesús pejuwajan naexasitiliajwa

1 Xan Judas, Santiago pakoewnan, nabistax Jesucristoliajwa. Xan lelx ampox carta xamal waj-ax Dios nejxasinkpimliajwa. Dios xamal makanot japon pejiwaliajwam. Jesucristobej pomatkoicha xamal tataeflafɨl. 2 Xan Dios kawuajna xamal beltaeliajwa, kajachawaesliajwabejpon chiekal duilaliajwam, a sew jiw swapich. Dios kawuajna xbej xamal nakaewa nanejxasinkaliajwam.

## Judas naewuajanpox naexasiti Jesús pejuwajan a sew jiw naekichachajbasamatas

3 Takoew, xamal xabich nejxasinkaxpim, xan kaes lelasian chiekal matabijaliajwam wajpaklon nakbu'weyaxaelpox. Pe japox lelxinil ampapelfutat. Xan wultaenx a sew jiw xamalxot patpox. Japi pat xamal naewuajnalijwa, naekichachajbalijwabej. Samata, lelxaelen xamal naexasisasamatam japi jiw naewuajanpoxan. Pe japi naewuajanpoxan chiekal najɨra-el, Dios pejuwajan swapich, xatis naexasisliawspox. Japawuajan pomatkoichaliajwa. Samata, ijapi jiw buxfia'e buxkofaliajwa naewuajanpoxan! 4 A sew jiw xamalxot pat. Japi pat xamal naekichachajbalijwa. Japi, me-ama Jesús pejuwajan naexasit wut, jakabuan-aechi. Pe japi jumchi-el diachwuajnakolaxpox. Asbuan jumch jum-aechi: “Dios nakbeltaen xatis babijaxan isaspojanliajwa. Samata, kaes babijaxan isfulas wut, Dios nakkastikaxil” —aechi asbuan jumch. Naexasis-eli Jesucristo, japon kaenpon wajpaklon, japi isfulaliajwabej Jesucristo nejxasinkpoxan. Samata, asamatkoi Dios kastikaxaesi. Me-ama Dios chajia jum-aech japi jiwliajwa, jasox jachiyaxaes japi jiwliajwa.

**5** Diachwajnakolax xamal matabijamlis lelaxaelenpox. Pe nakiowa, lelaxaelen kaes chiekal nejchaxoelaliajwam ampx. Chajiakolaxtat wajpaklon Dios bu'wia wut pejiw, israelitas, Egipto tujnuxot ampatujnuleldin, do jawux, japixot asew toech, naexasis-el wuti Dios tato'laspoxan. **6** ¡Nejchaxoeldebej Dios kastikapox asamutpijiw, ángeles! Japi ángeles nejwesla isliajwa Dios tato'alpoxan. Samata, japi ángeles kofa Dios pijax bichax. Ja-aech wut, japi ángeles itkuxataxotdik jias. Japi jaxot machiyaxil nakolaliajwa. Japi ángeles wujnawet Dios kastikalijwas. Asamatkoi, kastikamatkoi pat wut, jiw babijaxan ispi pomatkoicha kastikaxaes. Jawut japi ángelesbej kastikaxaes. **7** Nejchaxoelam wut, ¡nejchaxoeldebej Sodoma paklowaxpijiwliajwa, Gomorra paklowaxpijiwliajwabej, asew jiw, mox duilpiliajwabej japapaklowaxanxot! Japapaklowaxanpijiw nakaepoejwa nabu'moejt. Watho'bej nakaewatho'a nabu'moejt. Samata, Dios to'a jit, pinjyax, natacholnaliajwa japapaklowaxanpoxasik. Jasoxtat japapaklowaxanpijiw toejafas. Samata, amwutjel puexa jiw, babijaxan ispi, pajut chiekal matabija Dios asamatkoi jitat kastikaxaespx pomatkoichaliajwa. Japajit toepaxil.

**8** Poejiw, xamalxot patpi, japi pat xamal naekichachajbaliaw. Japi babejchowbej. Me-ama pejwujnapijiw, ja-aech japi poejiw. Japi poejiw babijaxan is, masoxtat taenpoxan, asew jiw tae-elpoxan. Nejweslabejpi Dios tato'alpoxan isliajwa. Japi jum-aechbej babejjamechan Dios pej-ángelasiajwa. **9** Dios pej-ángel, japon pawulpon Miguel, puexa Dios pej-ángeles tato'lan, jumchi-elon kaejame, babejjame, Satanásliajwa. Me-ama poejiw, xamalxot patpi, jum-aech babejjamechan Dios pej-ángelasiajwa, jachi-el Miguel. Chajiakolaxtat Moisés tux wut, Satanás fisasia Moisés pejb't. Pe jawut, Miguel kitapae-el Satanás fisliajwa Moisés pejb't. Jawutbej Miguel jumchi-el babejjamechan Satanásliajwa. Asbuan jumch jum-aechon Satanásliajwa: “¡Dios xam nej kastike'!” —aechon. **10** Pelax poejiw, xamalxot patpi, babejjamechan jum-aech pajut jummatabija-elpoxanliajwa. Me-ama choef matabija-el isliajwa, ja-aech japi jiw. Samata, Dios kastikas wut, toesaxaesi.

**11** Diachwajnakolax japi jiw Dios xabich kastikaxaes, babijaxan is xot, me-ama Caín babijax is chajiakolaxtat, ja-aech xoti. Xabich platakakal kanasiapi. Me-ama profeta Balaam isasia,

chajia laeja wut, ja-aechlap-is japi jiw. Samata, japi jiw Dios pejjamechan naewuajan wut, chiekal naewuajna-el. Japibej pajut naexasis-el Dios tato'alpoxan. Chajiakolaxtat Coré naexasis-el wut Moisés tato'alpox, japon tuj, Dios kastikas wut. Xamalxot patpi, jachiyaxaeslap-is. Dios kastikas wuti, japibej tujaxael. **12** Xamal natamejlam wut xaeliajwam kaeyaxtat, jawut japibej xamalxot pat xaeliajwa, xamal suapich. Xamal nadala japiliajwa. Pelax japi padaeyax chiekal wejisa, xamal suapich, xaeliajwa, feliajwabej. Xabich xael wuti, japi xanejchadus-el asew jiw, puexa jiw kaechxajupaliajwa. Me-ama oveja tataeflan, nejchaxoel pejew oveja chiekal tataeflaliajwa, jachi-el japi jiw. Nejchaxoel asbuan jumch pajut natataeflaliajwa. Nejchaxoela-eli xamal tataeflaliajwa. Japi ispoxan xabich pachaema-el. Me-ama itloijen, iampi, joewa xafos, ja-aech japi jiw, pachaema-el xot asew jiwliajwa. Me-ama naebaechnae baechjil wut, kaelel tuj, ja-aechlap-is japi jiw, pachaema-el xoti asew jiwliajwa. Japibej, me-ama nae, potathina chakuchnae, kaelel fo'aliajwas, ja-aech japi jiw. **13** Japibej, me-ama pintruxan pijabaspoq pamaklelde putase oelaliajwa, ja-aech japi jiw, isful xot babijaxan, padalapoxan. Japibej, me-ama ithaej fol wut, matxalpi, ja-aech japi jiw. Pomatkoicha japi jiw Dios kastikaxaes. Samata, duilaxaeli itkuataxxtot.

**14** Enoc chajiakolaxtat duk. Japon Adán pamon. Enoc Dios kajachawaech xot, jum-aechon ampox: “Wajpaklon Dios asamatkoi xabich pin-iakola pej-ángeles bu'pasaxael. **15** Dios tasalaxael puexa jiw, pejbu'wuajanpi, japi jiw is-el xot japon tato'alpoxan. Kastikaxaelbejpon puexa jiw, jum-aechpi babejjamechan Diosliajwa” —aech Enoc. Enoc chajia jum-aech japoxliajwa, matabijt xot asamatkoi xamalxot pasaxaelpiliajwa. **16** Japi jiw, xamalxot patpi, jum-aechi babejjamechan puexa jiwliajwa. Puexa pachaem wutbej japi jiwliajwa, nakiowa jum-aechful babejjamechan japoxanliajwa. Babijaxan isbejpi, pajut isasiapoxan. Do jawux, japi ispoxan asew jiw chapaeipi sitaeliajwas. Jum-aechbejpi asew jiwliajwa: “Xam chiekal pachaemam” —aechbejpi chaxduiliajwas wewe'paspoxan.

### **Judas naewuajanpox Jesús pejwuajan naexasiti naekichachajbasamatas**

**17** Takoew, xamal xabich nejxasinkaxpim, nejchaxoelam wut, nejchaxoelde Jesucristo pejjiw, apóstoles, chajia jum-aechpox!

**18** Japi apóstoles chajia jəm-aech: “Matkoivan toepax wəajna, jiw jəmchiyaxael babejjamechan Dios pejjamechanliajwa. Bə'wəajanpaeyaxaelbejpi Dios pejjiw. Xabich babijaxan isaxaelbejpi, pajut isasiapoxan” —aech apóstoles. **19** Japi jiw xamalxot naewəajan wət, jiw kaenejchaxoelaxil. Samata, xabich jiw nasalaxael. Japi, xamalxot patpi, isful babijaxan, pajut isasiapoxan. Japi jiw pejmatpəatanxot jil Espíritu Santo.

**20** Takoew, xamal nejxasinkaxpim, ¡chiekal naexasisfulde Jesús pejwəajan, Dios kaes chiekal xanaboejalijawam! ¡Dios kawəajandebej, me-ama Espíritu Santo xamal tato'al kawəajnalijawam Dios! **21** Dios xamal xabich nejxasink. Samata, Dios to'a xot, ¡xamal chiekal duilde! ¡Wəajnawesfulde wajpaklon Jesucristo fəloeyaxoekpox, xamal pomatkoicha duilalijawam Diosxotse, xamal beltaen xoton babijaxan isampoxanliajwa!

**22** Asew jiw chiekal naexasis-elfuk Jesús pejwəajan. Samata, naewəajnam wət, ¡japi jiw chiekal naewəajande, japibej chiekal naexasislijawam Jesús pejwəajan! **23** Jiw, naexasis-eli Jesús pejwəajan, japi jiwlijawam chachoel, infierno poxaxaek xoti. Samata, ¡xamal kamta naewəajande japi jiw chiekal jəmmatabijalijawam, Dios bə'welijawas infierno poxasamatapi! Asew jiwlijawam tampoel Jesús pejwəajan, japi jiw chiekal jəmmatabijalijawam. Samata, ¡japi jiw chiekal naewəajande naexasislijawapi Jesús pejwəajan! Japi babijaxan is wət, ¡xamal japoxan nabej nejxasinke!! ¡Chiekal taem xamalbej isasamatam babijax, japi jiw babijaxan is wət!

### **Puexa Jesús pejwəajan naexasiti, japi chimijamechan jəmchiyaxaelpox Dioslijawam**

**24-25** Kaen Dios, japon xatis nakbə'weyaxael babijaxan isaspoxanliajwa. Japon naktataeflaxael isasamatas babijaxan. Asamatkoi, nuilaxaes wət Dios pejwəajnalel, wajpaklon Jesucristo təp xot babijaxan isaspoxanliajwa, bə'wəajanjilaxaes Dioslijawam. Jaxotaxaes wət, Dios pej-itliakax taens wət, xabich nejchachaemlaxaes. Samata, jəmchiyaxaes Dioslijawam: “¡Xam xabich pachamam!” —chiyaxaes, xabich mamnik xoton. Puexa jiw matabijaxael Dios. Japon xajəp puexa jiw tato'lalijawam. Jasoxtat Dios chajiakolaxtat majt puexa jiw tato'al. Amwətjel nakiowa, ja-aechfuk japox. Dios puexa jiw tato'laxaelpox, japox pomatkoichalijawam.